

ЛҰИМА СЭРИПОС

5 апреля
2018 года
№7
(1169)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Е. Меров бәрүм хури

Ты хурит маныщи хум Владимир Пакин колә пōхыт пōслым
ōлы. Тав Ивдельский район Пўма пāвылт ōлы, вōраян мāныл
юв ёхтыс. Ты хум урыл 6-7 лōпсыгт ловиньтән.

Ты
номерт
ЛОВИНЬТӘН:

Колыт ёмцакв
щёпитан
олныт нōх-
нётает

2

Шугур пāвыл
миркол
кўщай

4

Нә хōтпат
юнсхатуңкве
Ягримн
ёхталасыт

8-9

Мāныщи
Ўй эргыт ат
ёрувлавёсыт

12-13

Сўкырья
мāхум
мўйлысыт

16

ЛЯХХАЛЫТ

Колыт ёмщакв щёпитан олныт нōх-нётавет

Ювле хультум ётпос 29 хōталёт округ Дума сапрāниятэ олыс. Мирн пёриим депутат-хōтпат тот рўпитанкв овылтахаманыл пāsныл ань хōтхуйпловит щёс акван-атхатыгласыт, хус арыгтем сāvсыр сākконыт мощ мōт щирыл хассаныл.

Овлёт почётный грамота нёпакыл минэ това хōтпат урыл сākкон пирмайтасыт. Та мāхум халт Ольга Васильевна Баранова наме олыс, ты нё сāv тāl Хулюмсўнт пāвыл кўцаиг рўпиты. Ос Мегион ўст оlnэ сака сāv хōтпат янытлавёсыт.

Элаль тāн ты урыл потыртасыт. Ань сāv хōтпа ўсыт ляпат дачаг лāвнэ пāвлың мāt олэгыт, тот тāн «прописка» вāрсыт. Ос хунь пёриян вāрмалъ вāраве, тāн нэмхōт нёпак тāратаңкв ат вёрмёгыт. Таимāгыс ань Нижневартковский районт оlnэ Излучинск пāвыл нупыл сāv тамле дачаң мā хасвес. Ань мāхум тот тантирот олуңкв ат патэгыт, тāн ты пāвыл миркол нупыл тах хансавет.

Ос акв сākкон урыл потыртаманыл порат депутатыт халанылт сака воритотсыт, тав руц лātңыл тох лāваве – «О трудозанятости населения». Алексей Петрович Варлаков та департаментыт кўцаиг олы, тав лāвыс, мāн округувт сака мощца хōтпа рўпата тāl олэгыт, Россия янытыл мāн атыт местат олэв.

Ос това депутатыт тавён лялыт лāвсыт, тāн манрыг ўрккёгыт. Округув янытыл рупата ат ошнэ мāхум ёмашакв те ловиньтаңкв, тōнт тāра тах паты, мāн мāvт сāv хōтпа рўпата ат оныщёгыт. Пāвлың мāt сāвыңпālэ мāнылат хōтпат тāн ат рўпитэгыт.

Еремей Айпин ты урыл потыртаманыл порат тох лāвыс, Ниж-

невартковский районт мāнь пāвлың мāt рўпата тāl оlnэ туп тит-хўрум хōтпа мирколт наманыл хансым олэгыт. Ос мōтаныт тув шар ат хасхатэгыт. Тув хасхатнэ мāгыс, тāнанылн сака сāv нёпак атуңкв эри. Мāхманув сāvсыр мātт нёпакыт атуңкв шар ат кāsашёгыт. Тох рўпата тāl лāшал элаль та олантэгыт.

Акв сākконын ос тамле йильпи вāрмалъ хасвес, оlnэ колыт хот-щёпитан мāгыс тыгыл элаль олныт нōх-нётавет. Ты мирныл атнэ олныт тох лāвавет – «взносы за капитальный ремонт». Сāv хōтпа ты олн шар ат ойтэгыт. Яныгпала мāхум урыл та сākконт тох хансым олы, 80 тāланыл тōвлум хōтпатн ты олн ойтүңкв ат эри. Тыкос олн миңкв ат эри, ос олн тāнанылныл виве. Тувыл ты олнаныл ювле ойтавет.

Ань депутатыт титыглахтасыт, манрыг

ты сākкон тох хасвес. Округ кўцай Борис Хохряков ювле лāвыс, тāн, округ Дума депутатыт, нэматыр вāруңкв ат вёрмёгыт, ты тēла федеральный сākконт хансым олы. Овлёт тот ёмашакв вос хансавет, тувыл уш округ сākконт ты тēла пентүңкве вёрмавет.

Ювле хультум ётпос 18 хōталёт Россия Президент мирн пёриявес. Мāхум нёпак хōт тāратасыт, тот тина пōслын сāv мāнь камерат рўпитасыт. Ань тāра-патыс, та хōталт округувт сāv люль вāрмалъ вāрвес. Белоярский район Полноват пāвылт мāхум хумус пёриясыт, ань ёмщакв уральтавет. Тот оlnэ мāхум пёриян нёпаканыл ловиньтаңкв шар ат патвёсыт, пуссын хот-вущкасаветыт. Ань депутатыт лāвсыт, ты люль вāрмалъ вāрум хōтпат наманыл мощер-тын тāра тах паттавет.

**Валентина
ВАСИЛЬЕВА**

«Титул» намба нёпакыт ошнэ хōтпат мāгсыл ляххал

«Титул» намба инвестиционный компанияныл пицма ёхтыс, тāн 2018 тāl яныгпōль ётпос вāt нупыл хўрмит хōталт сапрāни вāруңкве таңхёгыт.

Тот олныт хоталь холтавет, мансāвит олн сэлсыт, та урыл акционерыг лāвнэ хōтпатын потыртаңкве патэгыт. Акционерыт – ты акция-нёпакыт ошнэ мāхум тох лāвавет, тāн халанылт мāн ханты, мāныщи ос

ёрн мāхманув тамле нёпакыт оныщёгыт.

Ляххалт хансым олы: сапрāни Ханты-Мансийск ўст, Карла Маркса ўсхулыт, 15 колт вāраве, ёхтын хōтпат лов щёст нёпакн хансуңкве патавет ос титхуйплов щёст

сапрāни овылтахты. Мощца акционер-хōтпат те ёхтэгыт, ты сапрāни тōнт вāруңкве ат патаве, ётыл яңк нātнэ ётпос вāt нупыл нилыт хōталт уш вāраве.

Ты тының нёпак ошнэ мāхум инвестиционный компания вāрнэ рўпататэ урыл пуссын ищхйпың лōпсыт ловиньтаңкве вёрмёгыт: <http://www.titul.org/>.

Ханты-Мансийск ўст телефонаныл тамлет: (3467) 33-17-41, 33-17-44.

Ты коньпал тāн кāsың акционер-хōтпаныл электронный адрес вōвёгыт, тув тāн нāннан сāvсыр ляххалыт тётүңкве патэгыт.

**ПАО «ИК СЗРМНС
«Титул» колныл тётым
ляххал мāныщи лātңыг
Галина КОНДИНА
толмашластэ.**

ЛЯХХАЛЫТ

Тэлы сыс лёккарытын пусмалтавёсыт

Элн өлнэ павлытын тэлы сыс лёккарыт хумус ялантасыт, ты урыл кұщайт ляххал тотнэ хөтпатн потыртасыт. Профпатология центрыт рупитан кұщай нэ Наталья Кабаргина, махум агманыл тара-паттын ос тананыл хаништан кұщай ваңын хум Владимир Слабко, ос пусмалтан лёккарыт халт пуңкотнэ хум Александр Дарченко ёхталасыт.

Наталья Кабаргина таи лавыс, тан РФ Президент кетум латне щирыл рупитэгыт. Лёккарыт шар элн өлнэ павлытын талэ-тувёт яласаңкве ос махум пусмалтаңкве вос вермысыт. Таимагыс тан туи я хосыт «Николай Пирогов» найнхапыл

яласэгыт ос тэлы лёнх өлнэтэ сыс тан машинал яласэгыт. Ты найнхапаныл ос ат машинат пуссын пусмалтан ищхипың утыл щёпитым өлэгыт. Ты тал тамле машинат бат саграпнал этпос хурумхуйпов хоталыт Ханты-Мансийск үсныл

рупитаңкве минаят ос атхуйпов хоталт Хальүс районт Няхшамволь павылт махум пусмалтаңкве патвёсыт. Тувыл мот павлытын ялсыт. Щар юи-овылт, тыи маньполь этпос бат нупыл китыт хоталт лёккарыт Сургутский район Угут павылт махум уральтасаныл.

Та щирыл профпатология центрыт рупитан 17 савсыр лёккарыт 14 павлытын ялсыт. Тан Хальүс, Ханты-Мансийский, Нижневартовский ос Сургутский районытыт өлнэ махум пуссын уральтасаныл. Тэлы лёнх хосыт

машинал 6 сөтыра верыста яласасыт ос 2 сөтыра 935 элумхөлас пусмалтаңкве алы-масыт. Махум хөпсыяныл ищхипиң ут хосыт послувёсыт, нэ хөтпат щакваныл ёмщакв сусвёсыт.

Яңк нәтнэ этпос юи-овыл хоталанөт лёккарыт ос найнхапанылн талэгыт ос я хосыт мань павлың матын ялэгыт тах.

**Пульница
лёккарыт
потраныл
Тамара МЕРОВА
маньщи латңыл
хансыстэ.**

Номтыңыг хансум потраныл магыс янытлавёсыт

Округ Дума кол 2012 тал пәсыл телевидение, ратива, ищхипың утыт ос газетат рупитан журналистыт халт «Думать по-югорски» касыл вәрыглы. Аньнув тан ты касылыт нөх-патум хөтпат Ханты-Мансийск үст янытласаныл.

2017 тал сыс вәрим касылн бат хөтпат ос савсыр рупитан колыт танки рупатаныл кет-сысаныл. Жюри-хөтпат депутатыт вәрнэ рупатаныл урыл 200 сыресыр потрыт ловиньтасыт, ляххалыт

суссыт ос хұнтлысыт.

Касум хөтпат округ Дума кұщай ваңын хум Александр Сальников мүйлупсал мисанэ, ты элы-палт тав лавыс: «Саккылыт урыл потрыт хаснэ тэла – тыи сака тарвитың рупата, тот

касың вәрмалы янас ос мұсхалыг торгамтаңкве эри. Махум тот саккылыт урыл потрыт ловиньтанэныл ос суснэныл порат савсыр тэлат ёмщакв тара вос паттысаныл ос торгамтасаныл. Таимагыс ляххал тотнэ хөтпатн сака номтыңыг рупатаныл вәруңкве эри».

Ань ты касылт Екатерина Беспрозванных «Мангазея» агентстват рупитан кұщай нэ нөх-патыс. Китыт места кит хөтпаг халт ләкква-уртвес, тыи «Тюменский известия» газетат редакторыг өлнэ хум Андрей Фадеев ос «Лүимә сәрипос» маньщи газетат кұщай ваңын нэ Галина Кондина.

Галина Рудольфовна соссаң мир Ассамблеят кұщаиг өлнэ хумн Еремей Данилович Айпиның пұмашипа латың лавыс. Тав мах-

манув магыс хаснэ саккылыт урыл ёмщакв хұлтым потырти, тох ляххалыт хансұңкве мощ кұстыр. Хұрмит места «Сибирь» намба телекомпания вис.

Ты коньпал акв янас мүйлупса Виктория Белозёрован майвес, тав «Муксун.FM» намба ляххал хаснэ колт рупиты ос мөтан «Спектр+» намба колт рупитан махум майвёсыт.

Тувыл мот касум хөтпат эсгын нәпакыл мүйлуптавёсыт, тан халаныл «Ханты ясаң» ос «Лүимә сәрипос» газетат рупитан нәт ос өлсыт. Нөх-патум махум ман пуссын янытлыяңу. 2019 талт округ Дума 25 талэ төвлы тах, депутатыт сав номтыңыг ляххалыт хансұңкве журналистытн лавыс. Тан ос тах мүйлупсал щёпитавет.

Тамара МЕРОВА



Шугур павыл миркол кұщай



Руслан Владимирович Бринстер Кондинский район Шугур павылт миркол кұщайг Ұлы. Тав Карым павылт самын патыс, мәнәтәгыл анәкватә Агния Ивановна ос ащойкатә Иван Васильевич Копьевыг Ұт яныгмас. Тән сас хонтаң мәнәтәиіг Ұлмыг. Тән тәнкі мәнәт сав мэхумн вайвесыг ос әруптавесыг.

Ащойкатә яныг хонтын хонтулқке тотыглавес, тав «За боевые заслуги» ос «За взятие Берлина» мағылн тагатан пөсыг Ұнышас. Ойка юв Ұтуме порат кәркамыг хұл алышлас ос вөраяс, мэхумн акваг нөтыс. Экваг-ойкаг мәнәтәгыл Ұмас тәлат вәруңке апганән хаништасанән, Руслан Владимирович тәнәтән сымың номтыл кәстыяге. Ос рұпататә урыл тав Ұлалы потыртас.

Шугур ос Карым мэхманә урыл потыр

– 2005 тәлт мирколн пәрияң кұщайт Ұвылтыг №131 сәккон хасвес ос ам Ұрнә нәпаканум тув щөпитасанум. Ос тонт мирн павыл кұщайг пәриявөсум, та пәсыл мирколт ты рұпитәгум.

Шугур мәнә павыл, Карым павыл

мән мирколувн Ұс ловиньтахты, акваёт сәтсәт сәвит Ұлумхөлас Ұлы. Павлагувт 75% соссаң мэхум Ұләгыт, тән халанылт тыи 438 мәнәтәиіг, 52 хантыг ос 6 Ұрныг. Савыңпәлә мэхманув, ты 67 хөтпа, школат рұпитәгыт, тувыл төват аквадох бюджет пәлыл олныл ойтнә мәт, тыи садикыт, ФАПыт, нәй харыгтан мэхум колт ос мирколувт. Котельный-кол ос тыгыл олныл ойтәве, тав туп рұпитан колыт пуссын иссылтыянә. Ұмас ләңх Ұлнә порат пәлтыглахтын әхвтас тыг тотәве. Павлың мэхманув тай тәнкі нәйвыл кұраныл пәлтыгләгыт. Тән мағысланыл «Юконда» предпринимательство кол нәйив щөпиты, мән тән Ұтаныл договор-нәпак хансәв. Тот рұпитан хөтпат пил вәтәгыт, ләхыс атәгыт, ос хұл алышлым манос вө-

раим олн тәнкі мағысланыл сәләгыт.

Нәйпос станция «Юграэнерго» Ханты-Мансийск Ұсныл филиалә тыт рұпиты, төва мэхманув тув вуйвөсыт. Тувыл «Карымское строительно-коммунальное предприятие» рұпитан хөтпат пәвлув сыстамыг Ұнышяныл, порс акванатәгыт ос мөт мән тотыяныл. Ос тәлы ләңх вәрәгыт. Ләңхыт вәрнәныл мағыс «Северавтодор» кұщай Ұт хұрум тәл кастыл договор-нәпак хансәгыт.

Ұлнә кол Ұс Ұнттәгыт, мөлтә тәл олн әтим Ұлыс, тән нәмәтыр ат Ұнттысыт. Ты Ұлы-пәлт нила щөмәя йильпи колн щалтсыт. Анә пәвлувт хөт щөмәя кол Ұрим хулытсыт. Ты тәлт кит щөмәяг мағыс кол Ұнттуңке патәв. Йильпи колыт тәс пеноблочный кирпичил Ұнттавет. Төва мэхманув «Переселение» программа щирыл мөт мән Ұлуңке ке вәнтләгыт, тыт Ұлнә коланыл мәнәвн хулытуптыяныл ос мән мөт щөмәятын мыганүв.

Шугур пәвлувт ат ләпка рұпитәгыт,

пуссын хотты хөтпатн Ұнышавет, тән тәнкі мөт мәнәл тәнүт тотәгыт. Аква ләпка «Юконда» пәлыл рұпиты, тув хұл, нөвыль, ләхыс, пил мэхумныл Ұвтәгыт ос Ұлалы тыналәгыт. Мөт ләпка ос пәкарня «Карым СКП» Ұнттысыт, тот тәнүт, нәнь тыналәгыт. Пәкарнин пәвлың хөтпат рұпитаңке висыт.

Аква тәрвит вәрмәль клубт Ұнышәв, тот кұщай нәв нәвраме самын патнә Ұлы-пәлт Ұшлахтуңке минас. Мөт мәнәлат әги пөхан минас, тот анә кит хөтпаг рұпитаңке хулытсыг, аквадә звуко-режиссёр ос мөтан мәнәлат хөтпат тәланыл Ұт рұпитан нә. Әргүңке ман йиквуңке хаништан хөтпа әтим.

Туи нәврамыт Ұшлахтынәныл порат мультфильмыт сунсуңке клубн тотыглавет. Тот клубт ос школат рұпитан хөтпат аква-нөтхатым рұпитәгыт. Тувыл «Нәврамыт павыл» Ұшлахтын колн ялантәгыт. Анә мэхманув пуссын Ұмшакв Ұшлахтуңке вос вөрмысыт, клубт савсыр кәс вәруңке



Шугур павыл

Әри, таимәгыс әргыт ос ййквыт ханищтан хөтпа тув хөнтнуув ке, щар ёмас өлнүв.

Такви щёмьятэ урыл

– Ам омам Карымт самын патыс, а́там Казахстан ма́ныл тыг ёхтыс. Тав немец хум, вёрт рұпитаңкве тыг кётвес. Тыт омам ёт хөнтхатсыг ос тувыл акван-минасыг. Ам хұрум тәлум төвлум порат ма́н Луговой павылн вантлысүв, ам тот школа а́стласум.

Өвләт физкультура ханищтан хөтпаг ханищтахтүңкве тахсум кос, тувыл армиян минасум. Юв ёхтысум ос Шугур павылн мүйлуңкве ялсум, тот хулытсум ос ётылнүв нә тотсум. Мён ёквამентыл аквьёт Уральский государственнй педагогический университет а́стласмён.

Ёквам Инна Сергеевна ань школат рұпиты, ам тот лов тәл нйврамыт ханищтасанум. Мён хұрум нйврам о́нышимён, агимён ос аквты университет а́стлас. Ань ма́нь пыгкётэ янмалты ос о́йкатёнтыл тыт нянь вәрнә колт рұпитэг.

Пыгмён ма-вөй ос газовый на́мпа институт а́стлас, армиян ялыс ос ань аспирантурат элалъ ханищтахты. Ма́нь пыгмён яныгполь этпост нёлолов хөталт аквхуйплов тәлэ төвлы, тав Ханты-Мансийскат самын патыс, төнт Пасха хөталт о́лыс. Ты тәл ос аквта хөталт ялпың хөталт ёмты.

Пус кәт, пус ла́гыл тамле ёмас хөтпатын ма́н ләвёв, ёмщакв вос рұпитэгыт.

**Тамара
ХАТАНЕВА**

Сәкконьтн хансым тәлат уральтавет

Соссаң мир Ассамблеят рұпитан депутатыг, сәвсыр департаментыг өлнә кұщайт, тувыл тув вөвиньтәлым яныгпәла ос ма́нълат соссаң хөтпат сапрәнин атхатыгласыт. Тән хөт сыресыр вәрмалит урыл потыртасыг ос тув эрнә ләтың хұлтсыг.

Өвләт образование департаментыг кұщай хум Алексей Дренин ханты, ма́нъщи ос ёрн ма́хум ләтңаныл ўргалан сәккон урыл потыртас. Тавләвыс: «Соссаң ма́хум ләтңаныл элалъ тотнә нак ма́н кит вәрмалъ щирыл нөх-ўрмыгтылүв. Тыи щәнь ләтңыг ма́нътагыл садикыг ос школат вос ханищтавет ос тувыл ёмас, номтың ханищтан хөтпа ма́нки вос о́щсүв. Округувт ань щәнь ләтңыгн 263 ма́нь нйврам лов садикыг ханищтавет ос 1 668 нйврам 28 сәвсыр школат ханищтавет. Ты нйврамыт сәтхуйплов школат ханты ләтңыл ос аквхуйплов школат ма́нъщи ләтңыл ос Нижневартковский район Варьёган павыл школат ёрн ләтңыл потыртаңкве ханищтавет. Молты тәл Касум школат 9 классыг ханищтахтын агитпыгыг аттестация ма́гыс ханты ләтың экзаменыг пәриясыт. Федерация пәлыл ёхталам кұщайтн ты тәла мұстыс, ань тамле вәрмалъ элалъ тотуңкве вәрмилүв.

Образование департамент соссаң нйврамыт ёт рұпитан хөтпат ма́гыс ханищтапыг щё-



питәлыс. Тән «Педагог года Югры» касылыг янас номинациял вәрвёсыт. Ты тәл Полноват школат рұпитан ма́нълат нә Анастасия Вахат нөхпатыс. Ханты, ма́нъщи ос ёрн ләтңыг ханищтан хөтпат щёпитаңкве ма́навн Санкт-Петербург ўст өлнә А.И. Герцен на́мпа университет нёты. Ань Нижневартковский университет ёт ос потыртахтасүв. Ханты-Мансийский педагогический колледжит щәнь ләтың ванә агитпыгыг ма́н физкультура ос труд урокыг ханты, ма́нъщи ләтңыл ханищтан хөтпаг щёпитаңкве таңхёв. Тамле вәрмалъ артми ке, ёмас өлнүв.

Акв тәрвит тәла эрнә нәпакыг тәратан порат о́ныщёв. Школа ма́гыс хаснә ханищтахтын нәпакыг образование Министерство пәлыл «федеральный перечень» докуменгын хансым вос о́лсыт. Асүгорский институт тән ётаныл соглашение-нәпак ат хансыглас, таимәгыс тән нәпаканыл щирыл школат нйврамыт ханищтаңкве ат вәрмавет. Ос щәнь

ләтың урок щёс щирыл ат ловиньтаве, тав факультатив щирыл элалъ тотаве.

Мөт тәрвит вәрмалъ тамле – ханты ма́хум ань тыг мус хоты алфавитыл рұпитаңкве ат потыртахтасыг, халанылт воритотэгыт. Ма́н ань хосат пир-майтым ос йильпи алфавитыг Москват өлнә языкознание институтын кётсагүв. Тот учёныгн ёмщакв уральтавег ос матыр ләтың тән кётэгыт, тох элалъ рұпитаңкве тах та патэв».

Ты вәрмалит о́вылтыт Ассамблеят рұпитан депутатыг, М.К. Волдина ос Г.И. Егорова мүй ёквәг, ләтың ләвсыт. Ты тәлат тән элалъ уральтаңкве патыяныл. Тувыл соссаң ма́хум пуссын вәрмаляныл уральтан ма́гыс тәнки Уполномоченный хөтпа пәриим вос о́щсыт, ты урыл сәккон щёпитасыг ос округ кұщайтн ләтың кётсыт. Кұщайт ты тәла нупыл номтаныл ат паты. Ань соссаң депутатыг ты сәккон элалъ тотнә ма́гыс иң рұпитэгыт ос ётыл мөт сапрәнит тах потыртэгыт.

Тамара МЕРОВА

ХАНИЩАП

Ханищтахтын кол

Маньполь этпос 2 хоталэт Хальүс район Лопмус павыл школат сав мир атхатыглас — та колт нйврамыт ханищтахтуңкв овылтахтаманыл пасыл 15 тал товлыс. Школа коньпал тув садик тұлвес, мань нйврамаквет магыс янас колнакыт вярвёсыт. Тонт аквторыг тамле колыг Сұкырья ос Кимкьясүй павлыгт үнттувёсыг. Лопмус павылт школа тай сака хосат рүпитанкве патыс кос, ос таланэ мань ты йильпи кол щирыл ловиньтыанүв.

Тот ань 13 нйврам ханищтахты, садикын 14 нйврам яланты. 2013 тал пасныл ты кол Кульпас павыл школав нупыл хасвес. Савсыр тэланэ ос эрнэ нэпаканэ пуссын тав таратэ вэрианүв.

Нйврамыт ос тот рүпитан махум янытлан магыс Лопмус павыл школан сав мир ёхталас — Кульпас школат рүпитан учителит, «Лыжнёй Андрея» каснэ вэрмалын ёхталам махум, щань латың кастыл семинар вэрыглан нэт ос хум хотпат, павыл мир, мүй махум.



Р. Тихонова, Т. Канева ос И. Анямова

Ман пуссын аквёт хотал палыт рүпитасүв, докладыт ловиньтасүв, халанувт савсыр щирыл ханищтахтасүв. Этипалаг эргын-йиквнэ махум нупыл суссүв. Кульпас ос Лопмус школат рүпитан нэкет маньщи ос рущ эргыт эргысыт, йиквсыт. Ханты-Мансийск үст ханищтап департамент колт рүпитан нэ Надежда Костылева ханты ос рущ латңыл татем нётнэг эргыс. Светлана Динисламова такви хансум стиханэ ловиньтасанэ.

Государственный Дума депутат Татьяна Гоголева, Хальүс район янытыл ханищтап тэла палт пуңкоттнэ нэ Лия Андронюк ос Саранпавыл миркол хум Павел Артеев нйврамыт ханищтан ос янмалтан хотпат янытласаныл,

сав тал ёмашакв рүпитанэныл магыс Почётный грамота-нэпакытыл мисаныл. Това учителит округ Губернатор ваңын хотпатэн Алексей Шипиловын янытлан нэпакыл ос мүйлупсал кётвёсыт.

Ман тасавит мир аквёт татем ёмшакв мүйлысүв, халанувт вайхатасүв, щагтым потрамасүв. Тувыл касынув ёмас номтыл такви олнэ матэн минас. Ам номсэгум, тох ватихал восхонтыхлахтэв, тонт рүпатав элаль купнитыг вэруңкве патылүв.

**Кульпас
школа кұщай нэ
Наталья СЛЕПЦОВА
потре маньщи латңыг
С. РОМБАНДЕЕВАН
толмашлавес.**

Алы нёрыт Анупыл Пума павыл олы. Тот нила маньщи колтагыл олэгыт. Ам ань тот олнэ акв вёраян хум урыл хансэгум. Ты Владимир Николаевич Пакин, тав 1963 талт Сапса үст самын патыс. Хум аномн такви олупсатэ урыл мощ потыртас.

Ты маньщи хум маньтагыл нёрыт ляпат Талтъя павылт яныгмас. Тав щаняге-ащяге ань сас атимыг. Владимир Полуночный павыл школа-интернатыт лов тал ханищтахтас. Ос туп сат класс асталас, ханищтахтуңкве ат таңхыс, юв хулытсас.

Ётылнув 1977 талтты колтагыл Пума павылн вантлысыт. Овлэт тот паршин колт олсыт. Хум хотпат тув сыс йильпи кол үнттысыт ос тув та олмыгтасыт. Та ма картографытын «Юрта Пакиных» намайвес. Ань акваг тох лававе.

Щемьянылт тан сат нйврам яныгмасыт. Нила пыг, ань тан пуссын вёраёгыт, янас колтаглыл олэгыт. Щар яныг Виктор, ос Пума павылт олы. Ам тув ёхталамум порат тав нёрт вёраим яласас. Пётр ос щемьян тагыл юн олыс, ам ёхтумумт тав вёраянкве щёпитахтас. Николай Талтъя павылт такви үнттум колэт олы.

Владимир Николаевич щаняге-ащяге үнтталам пёс колт олы. Тав ватихал вёраянкве нёрн яланты. Тованакт сөрп катын-патталы. Ман ёхтумув элы-палт акв уй алапас, юв тотыстэ. Ос лавыс, нёрт мощща сөрп яласы. Тан савыңпалэ акв мат олэгыт, эл ат минэгыт. Хум вётың хоталытыт катын-патталы, ляпан



Нёрт өлнэ мәныщи хум нэ кинсы



Пума павыл



Борколн атхатасыт

ёхтуңкв ат майхатэгыт. Элыл ос нялын ат ёхта-вет, нас писалъ оныщи.

Ойка ань нёхыс магыс кёрнялит ат ўнтталы, нёматыр тув ат паты. Тав тананыл ампыл юил-коим хонтыянэ. Нёхыс сованэ ос воруи нёвлянэ Сапса ўсн то-тыянэ, тот тыналыянэ. Акв нёхыс сов тынэ кит сётыра.

Павыл ляпат Пума я овты. Сартын тот сав ошца хул олыс. Ань юи-овыл талытыт ос мощшамасыт. Мол-

ты тув сыс тав туп ат-хуйпловкем хул пу-виньтэлыс, тувыл та. Ивдельский районт өлнэ мәныщианув мощёртын хултэл ты хультэгыт тах.

Тувыл ос ам таве экватэ урыл китыглас-лум. Хум насати нэ ат оныщнэтэ. Тав лавыс: «Ам хулыгласум Саран-павылт ос Лопмуст сав мәныщи нэт өлэгыт. Тув ялуңкве сака таңхегум. Эрың хотты нэ ам ётум олуңкве кәсащи. Ам вораегум, сөрп акваг катын-патталегум,

нёхыс алыщлэгум. Ёса амки вараегум, «Буран» оныщегум. Ань хот-саквалас кос. Шаңквыт хонтэгум, варапилум, яласаңкве паты. Амккем олуңкве сака марщум. Анумен тамле эква эри, тав ворт ам ётум олуңкве вос вёрмыс».

Пума павылт хосат тагыл Ый ат йиквыглаве. Яныгпала хотпат хо-ласыт, ты вәрмалъ ёрувляңкве патвес. Юи-овыл щес муйлын вәрмалъ ловманкем тал ювле хультум порат

варыглавес. Тонт Ый Владимир Николаевич такви катын-пат-тыглас. Сэрьёр хум саңквылтапыл ёмшакв саңквылты. Ащёныл хультум пёс саңквыл-тап кол сәмет иң оныщитэ. Тованакт ёл-вуйлалытэ, мощ саңквылты. Хум ты накт пенсиян патыс, нёлолов сётыра сол-көвил ойтаве. Тамлеты ёмас мәныщи хум Пума павылт олы.

Николай МЕРОВ



Свонитан магыс хаңхылтап



Павлың махум



В.Н. Пакин

Нэ хөтпат юнсахатуңкве Ягримн ёхталасыт

Округ янытыл өлнэ сосса махум пёс йис вәрмалыныл нөх-вөрмалтан магсыл ань вәтихал савсыр ханищтапыт, суссылтапыт, хөнтхатыглапыт, касылыт вәрыглавет ос ванэ махум тув вөвиньтавет. Акв тамле ханищтап Ягрим павылыт мәньюполь этпос 22-24 хөталыт рүпитас. Хальүс районт өлнэ нэ хөтпат тот акван-атхатыгласыт. Тән мәньющи ос ханты нуйсахи йинункве ос хорамыл юнтункве ханищтавёсыт. Аквта порат касың нэ хөтпа такви юнтум пормасанэ тот суссылтасанэ.

Хальүс район миркол махум ос «Югра лылы-ёп» нампa организация отделениятёт рүпитан хөтпат ты ханищтап аквьёт вәрыгласаныл.

Хальүс отделениятёт рүпитан күщай нэ Любовь Васильевна Кашлатова лавыс: «Тамле ханищтап мән таимәгсыл вәрыглэв, тыт өлнэ нэ хөтпат мәньющи ос ханты маснут эрнэ щирыл, пёс холт вос юнтэгыт, мәньюлат хөтпат юнсахатуңкве пёс щирыл вос ханищтыяныл. Ты ханищтапт 40 арыгкем элумхөлас олыс. Махум Восыңтұрныл, Кульпасныл, Хальүсныл, Ягримныл ос Тэк павылыныл ёхталасыт.

Ты тәл мән нилыт семинар щёпитәлсүв, мөлты тәл мән Хальүст акван-атхатыгласүв ос мәньющи, ханты хорамыл юнтсүв. Төнт махум Октябрьский, Белоярский ос Хальүс районуытныл тув вөвыгласанүв. Ты тәл туп мәнки районуувт өлнэ нэт ёхталасыт. Ань ханищтап магсыл мощца олныл тәстувесүв. Ты элы-пәлт махум яласан ләңханьыл ос Хальүст өлнэ магсыл олн мән ойтсүв. Ань Ягримн ёхталам махум тәнки рүт махманыл пәлт олсыт ос ләңханьыл магсыл ос тәнки ойтхатасыт. Матёмас тыг ёхталаңкве тән кәсащасыт, ам ань



яныг пүмашипа ләтын тәнаньылн лавёгум».

Любовь Васильевна ос потыртас, ань мащтыр махум вәтихал акван-атыглавет. Ос Хальүс районт өлнэ нэт тув ат вөвыглавет. Тав китыглахатуңкве патыс, манрыг тән тув ат вөвавет ос тән юнтум пормасаныл ат суссылтавет. Төнт ювле лаввес, ань тот өлнэ мащтыр нэт пормасаныл пёс щирыл ат юнтыяныл, тән сувенирыт нупыл хартэгыт. Ты юи-пәлт Любовь Васильевна Хальүст өлнэ махум магсыл тамле ханищтап

вәрыглаңкве патыс. Ты вәрмалы урыл тав лавыс: «Мащтыр нэ хөтпат юнтум пормасаныл ёмашакв сунсыглаңкве патсанум, кәсаласум, сөль, төва мащтыр нэт савсыр хансат акван-тәлыгтасаныл, хоталь ат эри, тув та юнтумтаманыл. Ань тамле ханищтапыт ты урыл акваг потыртянянум. Төват кант-лэгыт, ювле лавёгыт: «Наң тай хотыл вәглын, хумус пёс йис порат махманув юнсахатасыт?» Ам ювле лавиянум, ты урыл учёный махмыт сав нэпак хассыт. Йис вәрмалыанув урыл ань тот сав ловиньтаңкве рөви. Пёс порат махманув манхурип маснут ощсыт ос манхурип хорамыл тув юнтсыт Т.А. Молданова, С.В. Иванов, Н.В. Лукина, Е.Г. Федорова, В.Н. Чернецов ос мөт хөтпат хансыгласыт.

Төва порат мащтыр нэт юнтум супыт манос тучаңыт сунсыглыянум, тәра аты торгамтэгум, мәньющи манос ханты хөтпа таве юнтыстә. Мән махманув касыңаныл



Л.В. Кашлатова



Р.И. Загородняя



Г.М. Курганова



З.П. Тоголмазова, В.К. Талья



тāнки щирыл юнс-хатасыт ос тāнки хорамыт оҗсыт.

Ань нэт тāнки юн-тум пормасаныл ёт тотыгласаныл ос тыт сусылтасаныл. Пёс порат мāньщи нэ нуйсахитэ акв хурип нуил йиныстэ, хорамыл ос акв оспа тōрыл юнтыстэ. Ань нэ хотпат пормасаныл сунсыгласанум, нуйсахи хорамыл китсыр тōрыл юнтманыл. Ханты нэт тāнки нуйсахияныл ос аквхурип нуил йины-яныл ос хораманыл китсыр тōрыл вāрия-ныл. Ань тāн номсэгыт, сāvсыр яңк тōрыл хо-раманыл юнтыяныл ке, нётнэг сусхатуңкве тах паты. Тыщирыл пёс мāхманув ат вāрсыт. Тувыл нуйсахи элы-пālэн акв яныт ос акв хурип хорамыт китпал

мус юнтавет. Тōват ань яныг хорамыл вā-рапияныл, элыл, ул-пыл, вос кāsалавет. Пёс мāхманув мāнь хора-мыт юнтсыт».

Мāхум тот хūрум группаг уртхатасыт. Акват мāньщи нуйсахи юнтсыт, мōтаныт хан-ты нуйсахи йинуң-кве ос юнтуңкве ха-ништахтасыт. Хūрмит группа юнтуп тūштын ут юнтсыт. Мāньщи хотпат ёт Тамара Семёновна Мезенцева рўпитас. Ханты мāхум Раиса Петровна Загородняя мāштырлаңкве ханиш-тасанэ. Любовь Ва-сильевна Кашлатова нуйсахин манхурип хорамыт вāруңкве рō-ви, та урыл потыртас.

Тамара Семёновна Мезенцева лāвыс: «Се-минарт мāн хūрум хō-

тал рўпитасўв. Мāх-манув Хāльўсныл, Тэк, Восыңтўр пāвылныл, Кульпасныл тыг ёх-таласыт. Тыт мāн акван-юрщхатасўв, мāнки халувт хаништахтасўв. Ам ос тыт лāввёсум, тōва рўпатанум ёма-сыт, эрнэ щирыл юнт-санум ос тōва хорамыт тох ат юнтавет. Ань ам-кинāнумн вислум, ань тах элаль эрнэ щирыл юнтуңкве ос нявра-мыт тох хаништаңкве патэгум».

Тōва мāштыр нэт тамле хаништапн кā-сың тāl вōвыглавет, тōват овыл щёс тув ёхталасыт. Зоя Петровна Тоголмазова, Татьяна Абрамовна Качанова, Мария Самсоновна За-харова тув Кульпас пā-вылныл ёхталасыт. Зоя Петровна ты вāрмаль урыл тох лāвыс: «Мā-навн сартыннув юнсха-туңкв хаништахтуңкве эрыс, ань нявраманув хаништаңкве эри. Тувыл хумус тāн ётаныл рў-питаңкве патэв, мāнки нэматыр ат вāгўв, ат хāsэв. Мāн ты семинар урыл хунь хўлыслўв, тāра тыг минуңкве щёпитахтасўв. Мāн ань таңхёв, тамле хаништап Кульпаст вос вāрыглаве. Ос мāнав вāтихал вос вōвыглэгыт, ул вос ёрувल्याныл. Ань мāн ат

рўпитэв, пенсият олэв, щаквщуңкве остаңхёв».

Хаништап оигпан элы-пālт мāштыр нэт тāнки вāрум рўпата-ныл урыл потыртасыт. Любовь Васильевна тāнанылн лāвыс, ань Хāльўс район янытыл юнсхатнэ нэквет кос олэгыт, тувыл нэм-хотьют «Народный мастер России» нам ат оныщи. Тамле намыл пёс щирыл мāштырлаң-кве хāsнэ хотпат мивет. Овлэт тāн рўпатаныл Москва ўсн кётавет ос искусствоведыт, этно-графыт ос мōт учёный хотпатн сунсавет. Ос тāн лāвэгыт, мāштыр хōт-пат тамле намыл миң-кве рōви ман āти.

Хāльўс районт олнэ тōва хотпат пормасаныл кётыглавёсыт, тāн тамле намыл аты майвёсыт. Ягримн ёхталам мā-хум лāввёсыт, тāнки пормасаныл эрнэ щир-ыл вос юнтыяныл, тув ос вос кётыгल्याныл.

Мāхум потыртах-тасыт, мōтыт тāl тāн Ягрим пāвылт мāнь-поль этпос оигпан ля-пат акван-атхатэгыт ос турлōпсыт, пальсакыт ос мōт утыт сакныл хартуңкве патэгыт.



Т.С. Мезенцева, Г.Н. Вынгилева

Людмила
ТЕТКИНА

СОССА МИР ӨЛҮПСА

Махманув үст мүйлысыт

Сосса махум сáлыл яласан кастыл
Ханты-Мансийск үсн сáв мир ёхталас.
Мүй хөтпат элы-хөн маныл олсыт, тувыл
үс махум пуссын «Мустанг» нампa каныт
атхатасыт. Тán халанылт маныщи нёт ос
хумит нýвраманыл ёт мүйлысыт.

Мáщтыр хөтпат халт
конкурс вáрыглыма,
ань хотьют кáтыл матыр
йөнтыс, суп ман сахи,
маснутэ вос суссылтытэ.
Я-ты, ань сосса нэквет
ос нýврамыт сценан
вöвүңке та патвёсыт.
Пуссын кáтыл юнтым
маснутыл олсыт -
мáныщи, ханты ос саран
супыл, пýркал, вáил,
сахил, пыгрищаквет
мольщаныл олсыт.

Тáн халанылт
мáныщи нэ **Тамара
Егоровна Гындыбына**
ёңхатахтыглас. Ам
тав ётэ потрамасум,
китыгласлум, хотыл
о́лы. Тамара Егоровна
тох потыртас:

– Ам Саранпáвылныл
ёхтысум. Совхозт пýркат
ос мот сáвсыр маснут
йөнтым 25 тáл рупитасум.
Ань ат рупитэгум,
пенсиян минасум, мотты
атпан тáлум төвлыс.

Рупатам сака тáрвityн
о́лыс, ань лáгланум-
кáтанум áгмыңыт, та
пöйтсум. Тыт мáныщи
супум ос пýркагум
суссылтасагум. Мáнь-
тагыл йөнтэгум, нýра,
сахи ман мот маснут
йөнтуңке пуссын
хáсэгум. Ты үст ам
нýвраманум олэгыт,
ханищтахтэгыт. Яныг
пыгум юв, Саранпáвылн,
мáшинал ёхталас, тав ётэ
тыг йисум. Ань тыт ты
мүйлэгум. Ялпыңхотал
áнум мýстыс, татем
пýмыш, кáс.

Тамара Егоровна áги
опарищ наме Хозумова,
тав хýрум пыг ос акв áги
о́ныщи – Серёжа, Иван,
Алексей ос Лена.

Мот мáныщи нэ **Елена
Борисовна Хозумова**
ос Саранпáвылныл
ёхталас. Тав áги опа-
рищ наме Албина, ат
нýврам о́ныщи. Яныг



И. Гындыбин, Д. Вынгилев, С. Хозумов ос О. Тарлин

пыге Сашатэ ос яныг
áгитэ Людатэ Ханты-
Мансийск үст рупитэг.
Вика áгитэ ос Коля пыге
тыт педагогический
колледжит ханищтахтэг.
Мáнь пыге Егор ин
школат ханищтахты.
Елена Борисовна ос
мáныщи супыл ёмыгтас,
ам таве китыгласлум,
такви юнтыстэ. Тав тох
лáвыс:

– Ам о́ныпум супыл
ёмыгтэгум. Суп амти ос
йөнтыгласум, о́ныпум
тав йиныглас, хорамыт
йөнтсум. Яныгмамум
порат мáныщи нёт акваг
йөнсхатасыт, омам ос

акваг матыр юнтыс,
щаквщи.

Элнаң мөйт вáнэ хөт-
па сáв о́лыс. Лопмуст
Татьяна Семёновна Ал-
бина сака сáв мөйт мөй-
тыглас. Номилум, хунь
тав потыртаңке паты,
мáн сүпасанув пáлыг-
пýнсым хýнтлысүв. Пёс
потрыт, áмщит, эргыт
хұлыгласүв, тох та
яныгмасүв.

Ты ятил мáныщи
махманув пус кáт, пус
лáгыл вос ёмыгтэгыт,
Төрүм ёт, Отыр ёт вос
олэгыт.

**Светлана
РОМБАНДЕЕВА**



Тамара Гындыбина



Елена Хозумова



Лопмус нэквет Мария ос
Кристина Толстых áгиягён ёт

Восыңтүр павылт рүпитан кол



Т.В. Собянина

Мань павлын мат клуб-кол те рүпиты, тонт тот өлнэ махум акваг матыр пумыщ ялпың хоталыл вэрыглавет. Ань Восыңтүр павылт туп ниласаттем хотпа ылы. Ос тот тан магсыланыл тирпащныл тит накла люлит клуб унттым ылы.

Күщаиг Татьяна Викторовна Собянина тот рүпиты. Тав рүпататэ ос олупсатэ урыл тох потыртас. Нэ Восыңтүр павылт самын патыс, тот яныгмас. Школа асламе юи-палт мот ман ханищтахтуңкв ялыс. Тара юв ат ёхтыс, матах тал мот мат ылыс. Тувыл юв ёхтыс, ос

культура колт күщаиг рүпитаңкв паттувес.

Ань тав ётэ тот нила хотпа рүпиты. Тан касың ялпың хотал кастыл павланыл өлнэ махум клубн вовыглыяныл. Тан магсыланыл матыр савсыр пумащ щёпиталэгыт, суссылтапыт ос пумыщ концерт вэрёгыт.

Няврамыт магсыл тит кружокыг «Умелые ручки» ос «Непоседа» вэресыг. Людмила Савельевна Хозумова няврамыт тот мащтырлаңкв ханищтыяне. Тув ёхталан няврамыт юнсахатэгыт, мотаныт сакныл хорамыт хартэгыт. Туи порат тан сака ат ёхталэгыт, ос тэлы порат сав агирищ, пыгрищ ёхталы. Това пыгрищит агирищит ёт сак квалгыт хартэгыт, аканит вэрёгыт.

Хурит пөслуңкв ос мот нэквен ханищтавет, тав наме Ирина Никифоровна Муравьева, такви опарищ наме Гришкина. Нэ таквинатэ маньщииг лавитэ, ос щань латне шар ат вагтэ, руц латңыл потырты. Сака ёмашакв руц эргыт эргияне. Ялпың хоталыт порат тав акваг эрги.

«Ўринэква хотал» янытлан порат клубт рүпитан хотпат павлын махум ёт пүрлахтэгыт, вөрн минэгыт, тот сытам мат пасан вэрёгыт. Хул исмит пайтэгыт. Няврамыт та сыс мань-

щи щирыл ёнгёгыт, халаныл касэгыт. Маньщи пыгрищит «хум йикв» йиквёгыт.

Ты колт рүпитан нэт тованагт концерт суссылтан магыс ос мот павылн ялантэгыт. Тал котиль этпос юи-овыл хоталанэт тан Шайтанка павылн ялсыт. Тот пумыщ концерт суссылтасыт. Нэквет пуссын эргысыт, ййквсыт, ошхуль вэрсит. Лаввёсыт, тан ватихал Анья павылн ос Шайтанкан вос ёхталэгыт. Сака пумыщ эргуңкв ос ййквуңкв хасэгыт.

Ань Татьяна Собянина лавыс, тан мот районытн ос ўсытн ялуңкв ос кос касашёгыт, ос олныл мощчал мивет. Ты рүпитан коланыл Ягрим нупыл хансым ылы, тувыл олныл таставет.

Ань манасавит олныл мивет, та темыл та рүпитэгыт. Хумус вёрмёгыт, та щирыл павлын махумн ос мот маныл ёхталан хотпатн кас вэрёгыт.

**Валентина
ВАСИЛЬЕВА**



Л.С. Хозумова



Клуб-колт рүпитан нэквет

ХАНИЩТАП

Мāньщи Ый эргыт ат ёрувлавёсыт



Кимкъясүйт, 2016 тал



Ханты-Мансийск үст, 2018 тал

Акв ханищтахтын вāрмаль
мōлалнув Ханты-Мансийск үст
вāрыглавес. Ас-угорский институт
ведущий научный сотрудник
рўпитан нэ Светлана Алексеевна
Попова пыгыт ос хум хōтпат
атыгласанэ.

Тāнанылн Ый йиквнэ
урыл потыртас ос
Ый эргыт эргуңкве
ханищтасанэ. Ам таве
ты вāрум рўпатаныл
урыл мощ титыгласлум,
Светлана Алексеевна тох
лāвыс:

– Ам хōт щёс Ый
йиквнэ мāt мāньщи
мāхманум халт олсум,
ос кāсың порат нэм-
хуньт Ый эргыт ат
эргувёсыт. Таимāгыс ам
номсахтуңкве патсум,
эргын хум хōтпа щар

ат хультыс, эри хотмус
пыгыт ханищтаңкве.
Мāн това мāньщи тўлыг-
лапанув ос эргавет. Акв
порат Хулюмсунт пāвылт
Пётр Егорович Вынгилев
мощ эргыглас, тўлыглап
янытэт эргуңкве ат
вёрмыстэ. Лōпмуст
Павел Прокопьевич
Сайнахов, Кимкъясүйт
Пётр Романович Кугин
эргысыг, тувыл Лэплат
Николай Иванович
Хозумов тит тўлыгла-
пыг эргысаге.

Ам тахсум, пыгыт вос
торгамтыяныл, хумус Ый
йиквес. Ты нāврамыт
тāнти нэмхуньт Ый
йиквнэ мāt ат олыгласыт.
Семинарт ам тāнанылн
Лōпмуст Ый йиквим
урыл тина суссылтасум,
тувил Кимкъясүйт
нāврамыт ханищтам
семинарув суссүв.

Овлēt хунь пыгыт
ханищтаңкве патсанум,
мāн эргыт ат вāсанув,
эрыг-лāтың ат ошсүв,
хотыл виңкве ат вāслум.
Хуньт пёс порат 1901-
1905 тāлыт порат мāн
олнэ мāвн Артури
Каннисто ёхталас,
сāв Ый эргыт нэпакн
хассанэ, тōнт тав Нях-
щамвōль, Хāнласам,
Яныгпāвыл, Халпāвыл
ос мōт пāвыл мāхум ёт
рўпитас. Ётыл юв ялмёт
фонографыг лāвнэ ут
тотыс, та утэ исвёща
хурипийвōвлытōныщас,
тōнт ос 1906 тāлт мōт
пāвылт олнэ мāхум Ый
эрганыл фонографын
хассанэ. Ты хансум
эрганэ Финляндия мāt
Хельсинки үст Кутус
нампa институтт
яныгсāt арыгтем тāl
сэкв мāt ошвёсыт. 2015
тāлт уш ишхипың утыл



«Мāнь Ысквет», 2018 тал



«Мāнь Ысквет», 2018 тал



Кимкъясүй, 2016 тал



Кимкъясүй, 2016 тал

дискын хасвёсыт, матъемас ам тувыл дискыл тётвёсум.

Ты эргыт нэпакн немец латһыл хансым олсыт. Надежда Васильевна Лукина тәнаныл руш латһыг толмашласанэ. Ань ос Татьяна Дмитриевна Слинкина финно-угорский транскрипциял венгрын хансым пёс эргыт, пёс потрыт кириллица буквал хансыанэ. Ань пыгыт дискын хансым эргыт хунтлыяныл, вәганыл хумус мак эргуңкве эрөгыт. Мән тәнанылн нэпакн хансым эргыт мисанүв, кәсың хотпа ань тащир латһыг ханищтыанэ.

Щар овил семинарн мән 2016 талт туй вортур этпост Кимкъясүй павылт атхатыгласүв. Түяг ам дискыл Финляндияныл тётвёсум, туй ханищтахтуңкве та патсүв. Тот яныг

хум хотпаг Константин Георгиевич Адин, Александр Иванович Монин, экват –Мария Сергеевна Мерова, Галина Константиновна Алгадьева, Елена Кирилловна Сетова олсыт.

– Тот нйврамыт эргыт ханищтаңкве патсыт?

– Ати, тән нәмхуньт Уй ййкв ат вәщиңта-сыт. Мән тәнанылн ты урыл потыртасүв, тинат сусылтасүв, Уй эргыт хунтлысыт. Вос мош торгамтыяныл, хумус тот матыр-ати вәрвес. Титынтыг мән Кульпаст тэлы порат нйврамыт атыгласанүв. Уй эрыг латһыг ханищтасаныл ос эргуңкве иң ат вәрмысыт. Хурмиттыг аквта тал вортур этпос «Мән Ысквет» пыгыт эт ханищтахтасүв, тән тот сатыт хоталувт эргуңкве та патсыт. Та элы-палт кәсың пыг манос хум эрыг латһыг тәнти катыл нэпакн хассаныл,



Кимкъясүй, 2016 тал

тащир ханищтасаныл ос эргуңкве та вәрмысыт. Владимир Меров ос Александр Вьюткин тәнти Уй ййквнэ мат олсыг, яныг хум махум эт тулыглахтасыг, таимагыс мот пыгыт тән нупылэн сунсым моляхнув ханищтахтасыт.

Ань Ханты-Мансийск үст семинарн театрыт рупитан хумыт, ЮГУт ос колледжит ханищтахтын пыгыт ёхталасыт. Уй эрыг латһыг ханищтаңкве тән Рудольф Васильевич Меровн ханищтавёсыт, тав Хорыңпавылныл олы, ань сатлов талэ. Пыгыт савыңпалэ мәнщи латың ат вәганыл, потыртаңкве ат хасёгыт, Рудольф Васильевич кәсың латың толмашластэ, хумус эргуңкве эри – тәнаныл ханищтасанэ. Мән «Холы эрыг» ханищтасүв, тав ати яныг, ётыл тах яныг

эрыг, тав ниласәт строчка оныщи, ханищтаңкве патэв.

Анумн Денис Комков нётыс, тав Ясунтыг ханищтахтамув порат эргуңкве патыс. Театрыт рупитан пыгыт тав нупылэ сунсым татем молях эргуңкве патсыт.

Ты семинар магсыл тән олныл нәмхотыл ат майлувёсыт, Светлана Алексеевна ос Денис Комков тәнти олныл маныр эри, ёвтыгласыг.

Мән Светлана Алексеевнан ты сака эрнэ тэлатэ вәрнэтэ магсыл пумащипа лавёв, Уй эргыт мәнщи латың ат вәнэ пыгытын ханищтаңкве, вәим, тәрвитың, таимагыс хотты латың мотнув щирыл лавнэныл магсыл нйврамыт нупыл ятил мойпыракве ул вос наралытэ.

Галина КОНДИНА



К.Г. Адин ос А.И. Монин, 2016 тал

Мотышевыт урыл суссылтап ӧлыс



Мощ мӧлал «Тӧрум Маа» нампа музейт Мотышевыт рӱт махум урыл выставка щёпитӧлвес. Тот тӧн тӧнки рӱтаныл пуссын хассаныл. Тамле суссылтапыт вӧтихал вӧрыглавет. Ань ты порат аквхуйпловит щёмья урыл потыртавет. Ты вӧрмалъ 2008 тӧл пӧсныл ӧлалъ тотуӧкве патвес.

Ты суссылтап Раида Тихоновна Петрачук, хӧнтаӧ мӧныщи ӧква, такви увциянӧ Анна, Лида ос Прасковья ӧт щёпитастӧ. Тав Урай ӧст ӧлы. Тӧн рӱтаныл Селивӧрстовыт ос Мотышевыт – хӧнтаӧ мӧныщит. Ты махум пӧс йис порат Конда я ватат ӧнлум Панкуаль пӧвилт ӧлсыт.

Раида Тихоновна лӧвыс: «Мӧн хунь рӱтанув

урыл хансуӧкве ӧвил-тахтасӧв, суссылтап урыл ат номсысӧв. Рӱтанув ул вос ӧрув-ласанӧв, тымӧгыс «родословный» потыр хассӧв. Ӑтыл ущ суссылтап вӧруӧкве вӧввесӧв. Мӧн омав ӧнышум пӧс пищмат ловиньтасанӧв, сӧв рӱт хӧтпанув та пищмат хосыт хӧнтсанӧв.

Рӱтанув Кондинский район Половинка пӧ-

вылт, Салехард, Тюмень, Ханты-Мансийск ӧсыт ос мӧт сӧв мӧтт ӧлмыт. Тӧва пищмат 1950 тӧл пӧсныл хулытсыт. Ань тӧнаныл музейн тотсанӧв. Рӱтанув мӧгылн тагата сӧв пӧсыт ӧщсыт, тӧнаныл ӧс пуссын суссылтаӧкве тотсанӧв. Махманув наманыл пуссын акв юи-пӧлт нӧпакн хассанӧв».

Раида Тихоновна щӧняге-ӧщаге акваг хӧнтаӧ мӧт ӧлсыг. Половинка пӧвилн 1920 тӧлытт вӧнтлысыг. Ӑще гражданский хӧнтлын накт хӧнтлыс. Тувил хум яныг хӧнтын ӧс тотыглавет. Тав война ӧлы-пӧлт колхоз кӱцаиг

рӱпитас. Ӑще хӧнтлын мӧн хунь тотвес, омаӧ колхоз кӱцаиг паттыглавет.

Рӱт махманӧ урыл нӧпакн хансуӧкве тавӧн Ольга Николаевна Гаврилова ӧс нӧтыс. Тӧн аквӧт архивыт кисхатасыт. Пищмат ӧмшакв ханищтасаныл. Ты хосыт потрыт ты хассыт.

Раида Тихоновна 1932 тӧлт Половинка пӧвилт самын патыс, тот яныгмас. Щӧнягӧн-ӧшагӧн мӧнӧтагыл нӧтыс. Колсори рӱпата вӧрыс. Колхозт мисколт, лувколт щӧр хот-хилыс, лувыт ос мисыт пумыл пинсанӧ. Школат ханищтахтаме порат нӧврамыт ӧлы-пӧлт стихыт ловиньтаӧкве сака ӧруптас. Та порат нӧпак ат тӧвилхатас, тӧн сӧс тармыл ос пӧрт тармыл потрыт хассыт.

Школа ӧстламе юи-пӧлт Салехард ӧсн ӧлалъ ханищтахтуӧкве минач. Тот педучилище ӧстлас. Тав сӧв тӧл Ямал мӧт соса пӧвил школат нӧврамыт ханищтым рӱпитас. Тӧнаныл ханищтаӧкве салыӧколытын ялантас. Пуссын аквӧт тот вӧт нупыл хӧт тӧл рӱпитас. 1987 тӧлт ӧква пенсия минач. Ань юн ӧщлахтым рӱтанӧ урыл потрыт ты хансы.

Николай МЕРОВ



О.Н. Гаврилова



Р.Т. Петрачук

Вөрколт өлнэ ягәгииг

Сәлы үрнэ сossa мәхманув Ханты-Мансийск үсн сәлың суныл касуңкве ёхталаманыл порат ам кит ханты ёкваг ёт потрамасум – Анна Петровна Нимперова ос Евдокия Петровна Кантерова. Ты ханты ёкваг Сургутский районныл ёхталасыг. Тән насати кит ягәгииг, әги өпарищ намён Колыванова.

Яныг үсн тән нъяв-раманән ёт ёхталасыг. Пыганән сәлың суныл кассыт, тән ос кәтыл вәрум маснуктанән, хүл ос пил тыналасыг. Ёрнколаныл ёт-то-тыгласаныл, каснэ кан ляпат тұшталасаныл. Мүй мәхум тув шалт-сасыт, исум шәй айсыт, толтыглахтасыт.

Анна Петровна яныгнуве, 1943 тәлт самын патыс. Ойкатә Василий Николаевич хосат әтимыг ёмтыс. Тән ат нъяврам өшсыг, Анна Петровна нъявранән тактёт янмалтасанә. Ёква тох ты потыртас:

– Ам налыман тәлум иң ат төвлыс, ойкам тәл хулытсум. Төнт яныг пыгум атхуйплов тәлә төвлыс, нъявратем әнумн акваг нётыс. Элнаң мәнылат хөтпат мори ат ёмсыт, сур ат айсыт, рүпитасыт, шәнь-әщанылн нётсыт.

Нъявранум мәнь порат пуссын әгмыл хартсыт, тән ётаныл вәтихал пүльницат хуясум. Пусмалтавет, тувыл операциял вәравет, тән ётаныл Тюмень үс мус тот та яласасум.

Охотоведыг рүпитасум, вөрүй, хүл, пил акваг мисув, тох хотмус та өлсүв, янмалтахтасүв. Ам ань тыхотал мус юн өлуңкве ат вөрмёгум, нъявранум ёт вөрн ялантёгум, хүл алыщ-лёгум. Онтолов апыгрищ ос аквхуйплов апыг нъяврам өныщёгум.

Евдокия Петровна 1953 тәлт самын патыс. Тав ләви, төнт сossa нә хөтпат пүльницан ат ялантасыт, нъявранылы ёрнколт манос мәньколт самын патсыт.

Тән сәт нъяврам өл-сыт, пуссын вөрт самын патсыт, тот яныгмасыт. Ань тән Анна ягәгитәнтыл хулытсыг.

Ащён Пётр Иванович Колыванов, ома-тән Екатерина Яковлева атпан арыгтем сәлы өшсыг. Та яныгмам мәнылт сәлыяныл ань үрияныл, янмалтыяныл. Евдокия Петровна ув-щитәнтыл нила класс әстласыг, Пим пәвыл школат ханищтахтасыг. Ты пәвыл ань үсыг ёмтыс, Лянтөр намыл пинвес.

Евдокия Петровна хүрум нъяврам өныщи, ойкатә өс хосат хотталыс. Щар яныг әгитә Ангелина, пыгаге Руслан ос Клима. Ёква ләвыс:

– Ам өс нъявранум амттем янмалтасанум.

Нянь винэ олн мәгыс акваг рүпитасум, сәлы үрим өлсум. Вөрт өлуңкве сака ёмас, үсың мәт хоса яласаңкве ат вөрмёгум. Нъявранмён мәньтәгыл аквёт яныг-масыт, ань халанылт нётхатёгыт. Пуссын шәнь ләтңыл потыртёгыт, пёс өлүпсав вәганыл, мәнти на-канув янытлыяныл. Колтәгланыл ёт сәлы үрим вөрт өлэгыт, нъявранылы янмалтёгыт.

– Нән улпыл пёс мөйтыт вәгын, ханты ёргыт ёргёгын?

– Нъявраныт хунь яныгмасыт, мөйт атхунь мөйтыгласув. Мён омагмён-әтягмён сәв мөйт вәсыг, потыртәлсыг. Та порат өлүпса тәрвитың өлыс, мәхум сәв рүпитасыт, яныгхөтпанув юн ат вәщинтасанүв.

«Буран» ат өшсыт, вөрт хөт-әти ләглыл яласасыт, вөраясыт, мөйтнә щёс сака хунь өшсыт, юв ёхтёгыт, вәгтал патёгыт. Мән әтяв акваг матыр кәтын-патталас – нёвыль, хул, вәс пуссын өшсув, тәтәл ат яныгмасүв.

Вөраян мәхум халт әтяв намың-суиң хөтпаг өлыс, өвыл мөстат акваг тав та вуйлысанә. Тав сака сәв вөраяс, вөрүй ос товлыңүй кәтын-патталас. Олн-нётмилыл акваг майлуves. Ам ань нъявранум пуссын нётыянум, апыгрищанум ёт акваг потыртёгум, матыр тәлан ханищтыянум.

Ань потрув та оигпас. Ты яныгпәла нёквег сәв тәл пус кәт, пус ләгыл вос өлэг, Най-Отыранән вос үргалавөг.

Светлана МАТВЕЕВА



Анна Нимперова ос Евдокия Кантерова ягәгииг

Сұкыръя махум мұйлысыт



Лұвың суныл тотыглавет

Галина Ларионова Саранпавылт нэпак ловиньтан колт рұптиты, ты тав мақ рұпататэ. Ос Сұкыръя павылт олнэ махум мағыс акваг матыр пұмыщ ос савсыр ялпың хотал щёпиталы. Тав тот самын патыс, яныгмас, таимагыс павлэ сака эруптытэ. Тав манавн тамле пұмыщ потыр тетыс.

Ань юи-ōвыл талытт Сұкырят савсыр ялпың хоталыт янытлавет. Рётың юсвой этпос сатхуйплов хоталэт тот павлың мир мұйлысыт, «масленицаг» лавнэ руш ялпың хоталн Саранпавылтн ос сав хотпа ёхталас. Махум нупыл Владислав Хатанзеев ос Павел Комарицкий потыртасыг. Ты ялпың хотал сат хотал янытлаве. «Тэлы» тотнэ хотпаг Галина Николаевна такви

олыс, тав мирн лавыс – нйврамыт тыхотал ёмашакв вос ёнгасёгыт, тонт тах тэлы мины. Тән ёнгасаңкв ат те патёгыт, тўя пора тах шар ат ёхты.

Тувыл нйврамыт ёнгасаңкв та патсыт. Тән магсыланыл тўйтныл яныг сып вәрвес. Төваныл сып тыпал ёрт олсыт, мотананыл ос мот ёрт. Халанылт касуңкв та патсыт, хотьютаныл шар ёрнувег ос кәркамнувег олсыт, тән сып урамм молях нōх-хāхсыт. Хум



хотпат халанылт ос кассыт, тән тәрвитың тер поталы акв катыл нōх-āлмыгласаныл, хотьютаныл савнув щёс нōх-āлмаялыстэ, тав нōх та патыс.

Саранпавылныл «Радуга» наппа эргын ос ййквнэ коллектив ёхталас, тән сав эрыг эргысыт. Хотьют касащас, тән ййкващасыт. Ты юи-палт «Тэлы» хуритэ нōх та пеламтавес.

Нйврамыт хотал палыт лувың суныл павыл мувлахи тотыглавёсыт. Ул касың нйврам сунын талматыглас. Лувыт ос хорамтāлвёсыт, сысаныл тармыл русың торыт пинтлавёсыт.

Та юи-палт мұйлын махум пуссын клуб-колн вōввёсыт, тот тән блиныг лавнэ вōвта нйнь арталаңкв лаввёсыт. Юв шалтум касың хотпа нйнь арталастэ ос лавыс, хоты нэ вāрум нйне тавён сака мұстыс.

Ты ялпың хотал вāрум касың хотпа пұмаципа лātңыл лаввес. Саранпавылт миркол пāлыл ты ялпың хотал кастыл олн майлувес, ты олнытыл мұйлын махум ос нйврамыт мағыс мұйлупсат ёвтвёсыт.

Потыр мāньщи лātңыл Валентина ВАСИЛЬЕВА хансыстэ.



Г.Н. Ларионова нэкет янытлы

Лұимā сәрипос

(Северная заря)
№7 (1169), 05.04.2018
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**

Тираж **1710** экз.

Заказ **1494**

Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.